


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-90	Al-Balad	20	1	Makkiyyah	Ke-35	4





### **Zaman Diturunkan**

Surah al-Balad diturunkan pada peringkat ketiga kehidupan Rasulullah s.a.w. di Mekah antara tahun ke-6 hingga ke-10 Kenabian, ketika itu Mekah yang terkenal dengan bandar yang penuh dengan keamanan dan kedamaian **الْبَلَدَ الْأَمِينِ** juga tidak selamat dan tidak aman lagi kepada Rasulullah pun. Bermacam-macam kezaliman dan kekejaman telah dihalalkan terhadap Rasulullah **وَأَنْتَ حِلٌّ بِهَذَا الْبَلَدِ**.

### **Perkaitan Surah Al-Balad Dengan Surah Sebelum Dan Selepasnya**

1. Di dalam Surah al-Fajr sebelum ini telah pun dinyatakan sifat-sifat **النفس غير المطمئنة**, dengan sebab tidak percayakan hari akhirat mereka tidak menerima keadilan kemasyarakatan, kerana itulah mereka begitu cintakan harta dan sanggup merampas harta anak-anak yatim dan orang miskin, mereka juga tidak teragak-agak untuk memakan harta pusaka tanpa sebenar. Di dalam Surah al-Balad ini keadilan kemasyarakatan dikatakan sebagai satu jalan yang sukar **الْعَقَبَةُ**, ia hanya dapat dilalui dengan berjaya oleh orang-orang yang yakin akan adanya hari akhirat dan mereka tentunya orang-orang yang bernasib baik kerana menjadi **أَصْحَابُ الْمَيْمَنَةِ** (ahli syurga).
2. Di dalam Surah al-Balad dan juga Surah as-Syams selepas ini ada tersebut tentang kebebasan memilih pada manusia, di dalam surah ini ia disebutkan dengan **وَهَدْيُهُ الْيَقِينُ** dan di dalam Surah as-Syams pula ia disebutkan dengan **فَأَلْهَمَهَا فُجُورَهَا وَتَقْوَاهَا**, kedua-duanya menunjukkan hakikat bahawa manusia itu mempunyai kedua-dua kemampuan sama ada untuk memilih jalan kebaikan atau jalan kejahatan. Dengan menggunakan kebebasan yang ada pada manusia dengan cara yang betul, manusia boleh menjadi ahli syurga, dengan menyalahgunakannya pula manusia boleh menjadi ahli neraka.

### **Beberapa Kata Kunci Dan Tema Utama Surah**

1. Di dalam surah ini dibuat perbandingan di antara **أَصْحَابُ الْمَشْأَمَةِ** dan **أَصْحَابُ الْمَيْمَنَةِ**.
2. Keadilan kemasyarakatan dan perekonomian adalah suatu jalan yang sukar di lembah kehidupan **الْعَقَبَةُ**, **أَصْحَابُ الْمَيْمَنَةِ** dan manusia yang bernasib baik jua dapat melepaskannya dengan berjaya, mereka ialah orang-orang yang membudayakan **التَّوَّاصِي بِالصَّبْرِ** (saling berpesan-pesan dengan kesabaran) dan **التَّوَّاصِي بِالْمَرْحَمَةِ** (saling berpesan-pesan supaya mengasihani satu sama lain).
3. **أَصْحَابُ الْمَشْأَمَةِ** pula adalah manusia yang malang dan celaka, ia tidak dapat melepasi **الْعَقَبَةُ** yang menuntut pengorbanan, dia tidak fikir Allah sedang melihatnya dan Allah boleh menghukumnya.